



# PWOKLAMASYON


21 ÒKTÒB




- 1- **Rété gadé**, Gwadeloup depawtèman fwansé jòdijou, padavwa an lanné 1635 pa asi Déhé-Sentwòz i vin on Koloni.
- 2- **Rété gadé**, an janvyé 1636, yo kyouyé YANS, on chèf Karayib, é, sé konsa pouvwa é sosyété kolonyal chouké asi tè Gwadeloup.
- 3- **Rété gadé**, an Òktòb 1801, karésòl a sistenm èsklavajis é kolonyal-la brenné, padavwa yonndé chèf Gwadeloupéyen a lawmé lévé gawoulé.
- 4- **Rété gadé**, an lanné 1802, yo woumété Nonm anba jouk a lèsklavaj. Sé té on koud gòj, on gòjèt poubon. Konfèdmanti, sèlbiten yo voyé douvan sé volonté a chèf a léta fwansé Bonaparte, kidonk, yo pa respèkté ahak.
- 5- **Rété gadé**, an lanné 1848, dézyèm abolisyon a lèsklavaj. Abolisyon a 1848 sé konsidéré on anchoukaj a tout pwofitasyon a sé èsklavajis-la. É, dayèpouyon, yo péyé-yo pou sa.

## LKP KA DÉKLARÉ :

- 6- Pwensip yo kriyé « citoyenneté », pwensip a « nouveaux libres », pa té andwa ki sé moral ki sé politik yenki vòlkannizé rèskonsabilité a-yo. An pon jan, sa pa té andwa pé bouch asi rèskonsabilité a-yo pou tout krim é pwofitasyon yo fè asi do a plizyè milyon Moun.
- 7- Asimilasyon jiridik, asimilasyon administratif, asimilasyon politik ki konmansé an bout a 18e syèk-la, pou i wouvè zèl a-y poubon an maws 1946, sé on mannigans. Silon Fwansé, sa ki dwa pou li, sé sa ki douwé dwa pou tout kalité Nonm. Siwvè ou nòz vlé on dèt biten ki sa, asiré pa pétèt yo ké chèché fèw pé.
- 8- Rèkonnèt tit « Gwadeloupéyen » ki vwè jou an bout a 1801 kon mo fondal pou di on biten fèt, pou di on Moun vwè jou. On Moun ki ka chayé an fenfon zantray a-y tout jénérasyon a-y, dépi tan yo vwè jou asi tè Bannzil Gwadeloup. Otila yo désidé fwitayé asi tè-lasa. Sé mo « Gwadeloupéyen »-lasa, nou ka sèvi épi-y pou nonmé tout Krèymoun-la listwa sanblé ansanm-ansanm é ki vlé kontinyé défann sa yo ni é sa yo yé asi tè Bannzil Gwadeloup.
- 9- LKP ka é LKP ké goumé kont tout kalité sistenm rasis, yo chouké asi tè Gwadeloup é dèt koté ankò.
- 10- Pa ni pon rézon adan listwa ki ka ba on Moun dwa asimilé on dèt Moun, pou Moun-la sa vin-li.
- 11- Fò pa konfonn dwa é kilti, ki sé pou on Nonm, ki sé pou on krèy- Nonm ; an pé ni menm dwa ki vou, men, konfèdmanti an pa oblijé sanm vou koupé kou.



- 12- Assimilé tout moun ansanm-ansanm, an menm balan la, sé on krim kont limanité ;
- 13- « Lèspwi gwadloupéyen » ki sòti adan listwa Bannzil Gwadeloup ka pwan souch a-y bon enpé lanné avan yo chouké koloni fwansé ;
- 14- Sitiyasyon ékonomik é sitiyasyon sosyal an Gwadeloup jòdijou, sé pitit a sistenm an moman lèsklavaj. Sé pou sa, onlo pòz adan zafè a « pwodiksyon », « transfòmasyon » é « distribisyon », tousa sé on éritaj kolonyal ;
- 15- On sitiyasyon kon sila pa jis é i ka chayé pwofitasyon asi pitit a èsklav, asi tout foul travayé é asi tout larèstan Pèp-la, an Péyi Gwadeloup ;
- 16- Konsèy Minisipal, Konsèy Jénéral é Konsèy Réjyonnal é onlo dèt enstitisyon politik fwansé a pa kréyasyon é santiman a sosyété ki fè Pèp Gwadeloup ;
- 17- Boulvès popilè an Mé 67, sé lèspwi patriyotik ki doubout asi pinanhan a-y, sé rézonnans a Òktòb 1801 ;
- 18- Fò chak Gwadeloupéyen pwan doubout a-y, chèché woupwan karisti a Nonm a-y ki ta-y. Chèché pwodui, bwè é manjé sa ki ta-y é wouliyané NOU ;
- 19- Ki sé rèlijyon, ki sé filozofi, ki sé lékonomi, ki sé politik, LKP pa douwé ni pon kalité mèt-é-sényè ;
- 20- Ni onsèl LKP pou toutmoun rikonnèt yo adan-y ;
- 21- Fò tout Gwadeloupéyen kolé tèt an larèl a Karayib, é, fò-yo mété janmdifòs la ki fo, pou kenbé sa ki ja konmansé an sans-lasa ;



## POU TOUT BON,



- 22- **LKP** ké mété on foul Moun an mouvman, an balan, pou NOU chanjé pou tout bon vwé, rèlasyon NOU douwé ni èvè Léta Fwans é èvè Léwòp ;
- 23- **LKP** ka pwan mo pou fè tousa ki fo pou finbat èvè gran soufwans a Jennès an nou, pou soutyèn rèvandikasyon a Travayé, é mobilizé tout Pèp la adan on gran **Konvwa Pou Konstwi Péyi Gwadeloup** ;
- 24- **LKP** ka woulé pou ni linité a konba pou tout Pèp ki ka chèché fè Moun vin Moun ;
- 25- **LKP sé LIYANNAJ AN NOU TOUT GWADLOUPÉYEN** pou fè lidé chayé viktwa pou Tout Pèp an nou...

-26- **Èvè LKP !!! Pou On POUVWA POLITIK AN PÉYI GWADLOUP KONT PWOFITASYON !!!**

-27- **LA GWADLOUP SÉ TAN NOU !  
LA GWADLOUP A PA TA YO !!  
YO PÉ KÉ FÉ SA YO VLÉ  
ADAN PÉYI AN NOU !!!**

